

御选历代诗余

御选历代诗餘

御選歷代詩餘卷六十一目錄

起九十五字至九十六字

滿庭芳

下

沈端節

方千里

楊澤民

黃昇

陳允平

張炎

石孝友

三首

劉褒

何夢桂

李清照

僧兒

吳激

段克己

劉詵

二首

張埜

楊樵雲

蒲道源

劉基

二首

瞿祐

吳子孝

四首

王慎中

商輅

周用

二首

董其昌

陳繼儒

吳宗達

周世臣

陳子龍

沈麋

二首

韓智珙

錢氏

沈宜修

陳契

前調

又一體

無名氏

燭影搖紅

又一體

周邦彥

廖世美

趙長卿

張掄

吳億

張鎡

趙善扛

高觀國

方岳

吳文英

六首

張炎

二首

孫惟信

無名氏

孫氏

湘江妓

袁易

天香

又一體

賀鑄

吳文英

二首

周密

王沂孫

李彭老

王易簡

馮應瑞

唐藝孫

呂同老

無名氏

前調

又一體

景覃

二首

御選歷代詩餘卷六十一目錄

附錄卷六十一目錄

附錄卷六十一

目錄

御選歷代詩餘卷六十一

九十五字至九十六字

司經局洗馬掌局事兼翰林院修撰加二級臣王奕清奉

旨校刊

滿庭芳

下

滿庭芳

沈端節

霧薄陰輕林深煙煖海棠特地開遲風光絕豔獨自殿
芳時須信東君主意花神會別有看持羣英外嫣然一
笑富貴出天姿日長春睡足粉香撲撲酒暈微微明
皇當日稱許最相宜妃子扶來半醉宮妝澹不埽蛾眉
偏憐處流鶯驚繞金彈拂叢飛

前調

次周美成韻

方千里

山色澄秋水光融日浮萍飄碎還圓數行征鴈分破白
鷗煙高下回塘暗谷寫幽思終日濺濺閒凝望殘霞暝
靄何處一漁船江南思舊隱筠軒野逕茅舍疎櫟慣
攜壺花下敲帽風前想像淵明舊節琴中趣何必疎絃
歸歟計不將五斗輸與北牕眠

前調

次周美成韻

楊澤民

春過園林雨餘他沼嫩荷點點青圓晝長人靜芳樹欲
生煙一徑幽通邃竹松風漱石齒濺濺平生志功名未
就先覓五湖船不如歸去好良田二頃茅舍三椽任
高歌月下痛飲花前果解忘情寄意又何在頻撫無絃
煙波友扁舟過我相伴白鷗眠

前調

黃昇

草木生春樓臺不夜團團月上雲霄太平官府民物共
逍遙指點江梅一笑幾番負雨嫩風嬌今年好花邊把
酒歌舞醉元宵風流賢太守青雲志氣玉樹丰標是
神仙班裏舊日王喬出奉板輿行樂金蓮照十里笙簫
收燈後看看丹詔催入聖明朝

前調

次周美成韻

陳允平

槐影連雲竹光團露小荷新綠浮圓簟紋如浪綃帳碧
籠煙迴合溪橋一曲初雨過流水濺濺闌干外沙鷗野
鳥飛過釣魚船浮生同幻境眼空四海蹟寄三椽但
隨天休問我後誰前要識淵明琴趣真真意都在無絃

薰風裏綸巾羽扇一枕北牕眠

前調

小春

張炎

晴皎霜花曉鎔冰羽開簾覺道寒輕臥聞啼鳥生意又
園林閒了淒涼賦筆便而今不聽秋聲消凝處一枝借
煖終是未多情陽和能幾許尋紅探粉也恁忤人笑
鄰娃癡小料理花鈴却怕驚回睡蝶恐和他草夢都醒
還知否能消幾日風雪灞橋深

前調

次范倅憶
洛陽梅

石孝友

蘭畹霜濃柳溪冰咽春光先到江梅瘦枝疎萼特地破
寒開勾引天涯舊恨雙眉鎖九曲腸回空銷黯故園何
在風月浸長淮當年吟賞處醉仙顚倒飛屑成堆怎

奈向而今雨誤雲乖萬里難憑驛使那堪對別館離杯
誰知道洛陽詩老還有夢魂來

前調

石孝友

瘦頰凝酥殘妝弄酒相逢一笑東風並肩攜手差落可
憐紅疑是回心院裏埋醉首吐作芳叢無端處雄蜂雌
蝶相美兩情通一從攀折後漢皋珮失銅雀春空想
桃葉桃根此恨能同多謝金鑾舊客收拾在芸閣籤中
還知否竊香傳粉輸與蠹書蟲

前調

寄別

石孝友

修竹接藍梅山聳翠小小佳處西安從來聞說今日遠
來看便好求田問舍耳溪澗目飽林巒爭知道塵緣未

了無計與盤桓 小蠻應念處絃孤 鳳鏡掩離鸞愁
再見多情素日閒閒早晚扁舟兩槳驚翠枕雲巘風湍
從前去殷勤細數細數萬重灘

前調

劉 袞

柳裊金絲梨鋪香雪一年春事方中燭前乍見花豔覺
羞紅枕臂香痕未落舟橫岸作計匆匆明朝去暮天平
水雙槳碧雲東 隔籬歌一闌琵琶聲斷燕子樓空歎
陽臺夢杳行雨無蹤後會芙蓉未老從今去日望歸鴻
愁如織斷腸啼鴂多事訴春風

前調

何夢桂

燕子芹乾龍孫籜老綠陰深鎖林塘午風庭院人試薄

羅裳數盡落紅飛絮摘青梅煮酒初嘗重門靜一簾疎
雨消盡水沉香把當年團扇恩情猶在未是相忘笑
山翁鬢髮早已蒼蒼說與乘鸞綠女看世間多少炎涼
更休怨百年一夢且共醉霞觴

前調

殘梅

宋媛

李清照

小閣藏春閒牕鎖畫畫堂無限深幽篆香燒盡日影下
簾鉤手種江梅漸好又何必臨水登樓無人到寂寥恰
似何遜在揚州從來知韻勝難禁雨藉不耐風揉更
誰家橫笛吹動濃愁莫恨香消玉減須信道埽跡情留
難言處良宵澹月疎影尚風流

前調

宋妓

僧兒